

**Upalungaarsimanermut inatsimmi aalajangersakkat ilaasa atuutilersinneqarnerannik
Kalaallit Nunaannut peqqussummut Namminersorlutik Oqartussat oqaaseqaatissaat
pillugu Inatsisartut aalajangiiffigisassaattut siunnersuut**

pillugu

Sanaartornermut ataatsimiititaliap

ISUMALIUTISSIISSUTAA

Siunnersuutip aappassaaneerpeqarneranut tunniunneqartoq

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Bendt B. Kristiansen, Inuit Ataqtigiit, siulittaasoq
Inatsisartunut ilaasortaq Jens-Erik Kirkegaard, Siumut, siulittaasup tullia
Inatsisartunut ilaasortaq Anders Olsen, Siumut
Inatsisartunut ilaasortaq Jess Svane, Siumut
Inatsisartunut ilaasortaq Villy Olsvig, Inuit Ataqtigiit

UPA 2017-ip nalaani ull. 2. maj siullermeerereernermi Ataatsimiititaliap siunnersuut misissorpaa.

Siunnersuutip imaa aamma siunertaa

Peqqussutip naalisarnerani qupp. 4-mi ima allassimasoqarpoq:

“Taamaalilluni upalungaarsimanermut inatsisip allanngortinneqarnissaa pillugu inatsimmut siunertaavoq, isumannaallisaanikkut pisussaaffinnut, ilaatigut atomip nukinganit atortussiassanik atuisut, uninngasuuteqartut imaluunniit assartuussisartut aammalu atomip nukinganit ingerlatsivinnik ingerlatsisut pisussaaffigisaannut, inatsimmi tamakkiisumik paatsuugassaannngitsumillu tunngavissiisoqarnissaa. Kalaallit Nunaannut upalungaarsimanermut inatsisip allannguutaata atuutsinneqalernerani, Kalaallit Nunaanni isumannaallisaanikkut iliuusissat pillugit pisussaaffiit, Danmarkimi atuuttussat, aammalu nunani tamalaani isumaqatigiissut malillugu pisussat, atuutilissapput.”

Nunani tamalaani isumaqatigiissut pineqartoq tassaavoq Atomip nukinganit atortussianik aamma atomip nukinganit ingerlatsivinnik sumiiffiini illersuinissaq pillugu nunani tamalaani isumaqatigiissut, tassungalugu Kunngeqarfik Danmark 1980-imi ilaalerpoq, taannalu 1991-imi atsiorneqarpoq.

Illersornissamut Ministereqarfimmit naalisagaq una atuarneqarsinnaavoq:

“Nunani tamalaani isumaqatigiissut Kalaallit Nunaannut atuuppoq. 2010-imi allannguutissamut nunani tamalaani isumaqatigiissummut Kunngaqarfik Danmark akuersivoq, tassungalu atatillugu allannguutissamut nunani tamalaani isumaqatigiissut Kalaallit Nunaannut atuunnissaamut tunuarsimaarfegarluni Danmark nalunaaruteqarpoq. Nunani tamalaani isumaqatigiissut allanngortinneqarnerani atuuffissat annertusineqarput, taamaaliordermi pingaartumik atomip nukinganit atortussianik aamma atomip nukinganit ingerlatsivinnik aserorterneqannginnissaannik illersuinissaq ilaatinneqalerluni. Nunani tamalaani isumaqatigiissummut allannguut ulloq 8. maj 2016 atuutilerpoq aammalu nunani tamalaani isumaqatigiissut maannakkut taagorneqalerpoq ”Atomip nukinganit atortussianik aamma atomip nukinganit ingerlatsivinnik sumiiffiini illersuinissaq pillugu nunani tamalaani isumaqatigiissut” (matuma kingorna nunani tamalaani isumaqatigiissut).”

Siunnersuutip Inatsisartuni siullermeerneqarnera

Atomip nukinganit atortussiat pillugit suliaqarnermi, inaaliisimanerme assartuinermilu isumannaatsuutitsilluinnarnissaq ataatsimut isigalugu tapersorneqarpoq.

Tusarniaanermi akissutit

Tusarniaanermi akissutit siunnersuummut ilanngunneqarsimapput, tamannalu Inatsisartut Siulittaasoqarfianit ilusiliinissamut piumasaqaatinut naapertuuppoq.

Ataatsimiititaliap maluginiarppaa, Namminersorlutik Oqartussani naalakkersuisoqarfiit pisortaqaarfiillu, kommunit sisamaasut, Kalaallit Nunaanni Kommuneqarfiit Kattuffiat aamma Kalaallit Nunaanni Politiit tusarniaanermi akissuteqarnissamut kaammattorneqarsimasut, kiisalu tusarniaanermik piffissaliineq piffissami 3. februarimiit 3. martsip tungaanoorsimasoq.

Tamatumunnga ataatsimiititaliaq oqaaseqaatissaqanngilaq.

Ataatsimiititaliap siunnersuummik suliaqarnera

Ataatsimiititaliap maluginiarppaa, immikkoortup siullermeerneqarnerani oqallinnermi siunnersuutip siunertaa imaalu pillugit paatsuungasoqartoq. Taamaattumik isumaliutissiissummi uani immikkoortumi aallaqqaasiummi siunnersuutip siunertaa ataatsimiititaliamit ersarissumik issuarneqarpoq.

Taamaalilluni ataatsimiititaliap paasinninnera malillugu maanna siunnersuutitut missingiut siusinnerusukkat aalajangiinernik marlunnik tunngaveqarpoq, tassaappullu UKA 2016-imi imm. 129 Upalungaarsimanerme inatsisip ilaata Kalaallit Nunaannut atortussanngortinnissaa pillugu, aamma imm. 158 il.il 2015-imeersut, taamaalillunilu siunnersuut una aalajangeriikkat kingunerannik malitseqartitsineruvoq.

Aallaqqaammut siunnersuutaasimasut pillugit ataatsimiititaliat suliarisimasaannut ataatsimiititaliaq taamaalilluni annertunerusumik ilassutissaqanngilaq.

Siunnersuutip aningaasatigut kingunissai

Siunnersuutip tunngavilersuutitaani aalajangiiffigisassatut siunnersuutip piviusunngornerani aningaasatigut allaffissornikkullu kingunissai allaaserineqassasut Inatsisartut Suleriaasianni § 33, imm. 1-mi allassimavoq.

Ataatsimiititaliap paasivaa, tamanna tunngavigalugu siunnersuutip piviusunngornerani tamanna Namminersorlutik Oqartussanut, Kalaallit Nunaanni kommuninut aamma inuussutissarsiortunut aningaasatigut aqutsinikkullu kinguneqarnissaa naatsorsuutigineqanngitsoq.

Saqqummiunneqartut tunngavigalugit ataatsimiititaliaq allatut naliliinissamut tunngavissaqanngilaq.

Ataatsimiititaliap inassutai

Tamanna tunngavigalugu ataatsimiititaliap isumaqatigiittup inassutigaa siunnersuut Inatsisartunit akuerineqassasoq, taamaalillunilu Upalungaarsimanermut inatsimmi aalajangersakkat ilaasa atuutilersinneqarnerannik Kalaallit Nunaannut peqqussut Namminersorlutik Oqartussat akuerisinnaagaat Naalakkersuisunit nalunaarutigineqarsinnaanngorpoq.


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.



Bendt B. Kristiansen,
Siulittaasoq




Jens-Erik Kirkegaard,
Siulittaasup tullia




Anders Olsen

11. maj 2017



Jess Svane

Villy Olsvig UPA 2017/120



Villy Olsvig